



Chantadas e stgelladas

Giuanna Caviezel

Chantar n'è betg mia fermezza. Ed i n'è insumma betg mia occupaziun preferida. Jau hai pensà che jau sappia forsa mitschar insaco. Però: impussibel.

Tge chantadas nunditgas che questas Rumantschas e quests Rumantschs pon far. Da tuttas uras, dapertut ed adina cun premura – cun ina premura excepziunala. Remartgabel è il fatg che nus essan er capabels da captivar autras persunas cun noss chantims. Schizunt il manischunz da l'autobus ha cumenzà a berglar en il microfon la saira suenter tschaina.

Bun, ussa tar ils gieus. Las dunnas han passentà in bellezza avantmezdi cun las Tirolaisas dal Sid. Lezzas han sustegnì nus cun intginas da lur atgnas giugadras – mintgamai quatter per mintga mesadad. Il giu è damai stà fitg amicabel ed equilibrà. Igl è davaira stà in grond gaudi ed in'atmosfera tut speziala. Oz avain nus schizunt gè in vair goli. *Patrizia Peer* è arrivada in di pli tard ed ha salvà nossa squadra da plirs culps sin il gol da nossas adversarias.

Ils umens han giugà il suentermezdi durant ina chalira ch'era apaina da supportar (er mo cun sunar la tiba a l'ur da la piazza). Els han giugà fitg bain ed han survegnì l'emprim gol pir suenter circa ina mes'ura. Els Slovens da la Carinzia han nizzegià bain inqual schanza, ma noss Rumantschs han cumbatti fin la fin. Er il giu dals umens è stà caracterisà d'ina prestaziun extraordinaria dal goli *Flurin Capaul*.

Ina chaussa dat gia ussa en egl. Tut las autras equipas han gronda simpatia per nus. Perquai datti differents motivs. D'ina vart faschain nus dapli craval a l'ur da la piazza che tut ils auters fans quintads ensemen – betg mo per nus, mabain er per autras equipas. Las stgellas èn franc er in factur per racoltar in u l'auter punct da simpatia. Las vuvuzelas forsa damain. Ma il factur central n'è ni la solidaritad ni la ruaida, mabain il fatg che nus essan simplamain «gailira».

* La giugadra Giuanna Caviezel scriva quest'emna regularmain da l'Europeada, il campinadi da ballape da las minoritads linguisticas en Europa.

* Dal rest – ils resultats finals dals dus gieus «rumantschs» da glindesdi èn stads suandantamain:

* Ils Slovens da la Carinzia – Ils Rumantschs: 0-6

* Las Rumantschas – Tirolaisas dal Sid: 0-3

* Dapli detagls davart il turnier da l'Europeada, era infurmaziuns davart tut las diversas minoritads linguisticas che participeschan al campinadi èn da chattar sut quest QR-code.